



An Official Organ of YMA, Khuangpuilam Branch.

YMA MOTTO

Hunawl hman that
Zofate hmasawwna ngaihtuah
Kristian nundan tha ngaihsan

Khawchin : Source - Accuweather.com

Khua a that rin a ni.
Temp - Max: 27°C Min: 21°C
Dar 4:32-ah ni a chhuak ang a,
Tlai Dar 6:00-ah a tla leh ang.

Tunkar chang vawn : Luka 6:5
“Mi tha chuan a thinlung robawm tha
ata thil thate a phawrh chhuak thin, mi
sual erawh chuan a thinlung robawm
tha lo ata thil tha lote a phawrh chhuak
thin; thinlunga liam khawpa khat hi a
ni kain in sawi chhuah thin.”

Khuangpuilam VLTF

Khuangpuilam VLTF Committee chuan Duty neih thin chu chawlh rih nise a tih angin Tomir thla ni 19, 2020 (Thawhlethni) atang khan a chawl rih a. Thu pawimawh leh emergency thil a awm anih chuan OB-te leh Committee member ten a tul angin hma an la dawn a ni.

Bazar erawh kar khatah wavi hnih (Thawhlethni & Inrinni) neih chhunzawm tur a ni.

i/c Pu HD Daniela,
Pu F. Lalbiaksanga &
Pu HD Vanlalauva

Mobile Duty team siam a ni ang.

Chairman : 9366151768
V-Chairman : 8837206466
Secretary : 9862327112

**Khuangpuilam VC-in
Tui connection buaipui**

Khuangpuilam Village Council chuan veng chhunga PHE Tui connection la nei lo/ thleng lo te buaipuiin, tunah hian Shalom LPS mualah leh Shalom UPS thlang mualah PHE pipe phum ni tawhin T-cluster 2 vuah a ni baw.

Tin, YMA bungraw dahna in hlui (Pu LC-a dawr hlui), NR pengah tui luanna tur tha taw tak siam tum mek a ni baw.

Kan VC hmalaknate a theih ang anga thlawpa a remchan dan anga lo pui theuh turin kan inngen nghal baw a ni.

*Incheinaa i mihrinna thuam
mawi i tum a nih chuan tha i seng
thlawm mai a ni.
I chetzia leh rilru puthmang
hman khan, sum sen vak ngai
lovin i inthuam mawi thei.
Thamawli nih ai chuan
Tlawmfingi nih a hlu zawk.*

Kolasib District-a Lockdown 4.0 kalpui dan chungchanga Bawrsap thuchhuah

Dated Khuangpuilam, the 24th May, 2020 (Pathianni) :

Tomir thla ni 18, 2020 chawhnu khan Kolasib District chhunga Lockdown 4.0 kalpui dan tur ngaihtuahin DC Conference Hall, Kolasib-ah District Level Task Force on Covid-19 chu an chairman Kolasib Bawrsap hoin an thukhawm a. Sawrkarin ruahmanna a siam zulzuia he thutkhawmin a rel angin hetiang hian Kolasib District atan inkaihhraina dan siam a ni.

I. Mipui pawn chhuah chungchang :

- 1) Village Level Task Force-ten mahni huamchhungah theuh mipui pawn chhuak te'n social distance an zawm ngei a ni tih an enfiah thin ang.
- 2) Mipui pawn chhuak apiangin Social Distancing tha takin an zawm tur a ni a; mask (hmaituamna) pawh vuah vek tur a ni ang. Hei hi VLTF te'n zawm a ni ngei em tih an enfiah thin baw ang.
- 3) Zan dar 7:00 atanga zing dar 4:00 inkarah, tul bik thilah chauh lo chuan tumah pawn chhuah loh ni se.

II. Mipui punkhawm chungchang :

- 1) Mipui punkhawm theihna chi reng reng khap tlat a ni.
- 2) Inneih inkhawm leh mitthi in lenpuinaah mi 20 aia tamlo tel theih ani anga, Social distancing tha taka zawm tur a ni ang.
- 3) Khawhar in/Mitthi lumennaah zai loh hram tum tur a ni.
- 4) Inneih lawmna, lungphun, anniversary etc. mipui punkhawm theihna ang chi reng reng khap tlat a ni.

III. Bungraw zawth tur lak chungchang :

- 1) Kolasib atanga phai lama bungraw la driver-te tan quarantine center bik siam tur ani ang a. Center ruat bik atang hian driver te'n bungrua an la thei anga. Bungrua an lak hnuhnun ber atanga ni 14 chhung an awm ang.
- 2) Bungrua chah lut tur reng reng chuan mahni veng VLTF te theuhah in-report tur ani ang.
- 3) Bungrua hlan thlak(unload) tur nei reng reng chuan VLTF hnenah in-report tur a ni ang a, VLTF-te enpuina hnuai hlan thlak chauh tur a ni ang.
- 4) Bungrua unload hun atan zan dar 6:00 atanga zan dar 10:00 ruat a ni a, hemi hun chung hian bungrua unload tur nei reng reng chuan an unload tur a ni. Hei hi Vairengte, Bilkhawthlir, Kolasib leh Kawnpui tan bik a ni a, khawdangah chuan VLTF ten tha an tih angin an kalpui ang.
- 5) Courier Service-te tan home delivery tih phalsak an ni a. Delivery ti tur te chu a ruaitu-in list mumal tak DC Office-ah an thehlut ang a, DC Office atangin ID siamsak an ni ang. ID neilo tan home delivery tih phal ani lo ang.

IV. DAWR HAWN LEH BAZAR CHUNGCHANG

- 1) Sawrkar thuchhuah angin dawr leh bazar reng reng tlai dar 5:00 hnuah hawn phal ani lo.
- 2) Sawrkarin ruahmanna a lo siam tawh angin VLTF tin te'n mahni area chungah, dawr inhawng inhnaih lutuk an awm loh nan, dawr inhawn chhawk dan turah ruahmanna an siam zui zel ang.
- 3) VLTF tinin mahni veng theuhah chawmhaz bazar an buatsaih ang a. Veng thenkhat bazar siam remlo tan an veng bulhnai a VTLF, bazar nei te nen inbe rawnin ruahmanna an (☞ Phek 2-na)

Editorial Board :
Editor: Pu Ricky MS Dawngzela
Jt. Editor : Pu Lalsiamkima
Treasurer: Nl. Florence Zoremsangi
Cir.Manager : Tv. Samuel Lalpekhlua
Contact No: 9862501858 / 9612691291
9612761781 / 7005494983

FLS Station - 9612566886
Chawngbawla Section
Leader : Pu F. Lalbiaksanga
96121 55162
Secretary : Tv. R. Lalnuntluanga
82599 60032
Vanapa Section
Leader : Pu Lalchualova
87300 99599
Secretary : Tv. Lallawmzuala
87875 41803
Khuangchera Section
Leader : Pu Lalramzaau
76408 95924
Secretary : Pu Zachungnunga Hrahse
76299 69989

Editorial.....
Inzir a hun
Kan nun phung, mihring mai
pawh nilo thilsiam dang zawng zawng-
ah hian hun lawomawm mai nilo hun
khirh leh harsa tawh tura duan vek kan
ni a. A tuarchhelte dam khawchhuah
reina tur khawvel a ni te pawh ti ila
kan sawisual tam awm lo ve.
Darwin-a chuan, 'Atheiapiang
(Survival of the fittest)' tiin a lo sawi a. Ni e, he khawvel
luahtu hmasa ni a rin, ramsa lianpui
pui hote pawh kha an ei khawp an hmuh
zawh loh avanga rem ni a ngaih a ni a;
a thente erawh taksa pianphung te zawk
leh in-fit zawk, tuarchhel zawka inthlak
danglamin tun hun thleng pawh an
awm ni a ngaih a ni.
Kan hun tawh mekah pawh hian
dam khawchhuah tura theihtawp kan
chhuah a ngai dawn hle mai. Engtin?
1) A hmasa berin min beitu natna laka
kan inven that a ngai.
2) Kan aiawh, keini aia thiam zawkte
rorelna hnuaia kan kun thiam a, an
hmalakna kan thlawp that a paw-
mawh. Ro hran ilo neih ve rengawang
leh i thawihlohna khan dinhmun a
tiderthawng a nia.
3) Ei leh in tur a tlem telh telh theih
awangin chhungtinte'n kan eitur
engemaw chen tharchhuah ve a ngai.
4) Kan nunphung thlak danglama,
mamawh tih tlem a ngai.
5) Puar leh fanna nilo, hlimhlawp thil
mai maia inhnangfak loh a tul.
6) 'Inlên pawh hnam' nih a hun hrih
lo; inlên pawh theih hunah aw!!
7) 'A ho ê!' hi a ho reng lo; a hre tam
apiangin 'A ho ê!' tih an nei tlem.

Branch YMA Office Bearer		
President Pu HD Daniala 9863212083	Secretary Pu Lalremsiama Varte 9862327112	Treasurer Pu David lalrosanga 9436158962
Vice President Pu S. Lalthangliana 8787326114	Assistant Secretary Nl. Florence Zoramsangi 9612761781	Financial Secretary Pu Rotlingpuia 9862385193

(Phek 1-na zawmna)
siam thei ang.
4) Dawr/Bazar-a kal tur te'n so-
cial distancing tha takin an
zawm theihnan VLTF tin in
ruahhmanna an siam anga, chu
chu zawm ngei a ni tih an
enfiah thin bawh ang.
V. Motor tlan dan chungchang :
1) Motor intlanchhawk bikah Aizawl
Municipal Area chauh tih a nih
avangin Kolasib District-ah chuan
intlanchhawk tawh loh tur a ni.
2) Aizawl Municipal Area kal tur
bik tan odd-even hi zawm tur a
ni ang a. Mimal, tul bik thila
Aizawl kal tur te chuan Zonal
Magistrate hriatpuina la in an kal
thei ang. Sawrkar guideline in ex-
emption a pek te zing ami,
Kolasib District atanga duty paw-
i-mawh bika Aizawl-a tlan loh ni a
kal tur te chuan an nihna ti chiang
turin duty order emaw Dept. ID
emaw an keng tur ani ang.
3) Passenger phur motor reng
rengin an phurh theih chin piah
lam phur phal a ni lova, passenger-te
hman turin hand sanitizer
englai pawhin an pai reng tur a ni.
Driver leh Passenger te'n
mask an vuah ngei ngei tur a ni.
Driver-in a ngun thei ang berin
motor kawngka hawnna leh vawnban
te an sanitize (ti thianghlim)
thin tur a ni.
4) Bungraw phur motor leh passenger
phur motor ten khaw chung
duhna lai laiah an din lohna turin
mahni huam chungah Village
Level Task Force ten hma an la ang.
5) Khaw kar kawngah motor ding
khaw muang an awm leh awm
loh en turin Jt.VLTF Mobile Team
ten a tul angin Highway dung
an fang thin bawh ang.
6) Vairengte leh Bairabi Check-gate-ah
motor lo lut tur reng reng
chu motor hma ah an kal na tur
khua chiang takin tar sak zel tur
a ni ang.

**Lockdown 4.0
inkaihhraina Tihbelhna**
Lockdown guidelines Or-
der No. B. 13021/101/2020-
DMR/Pt.II dated 17th May, 2020
a tihchhuah a Clause 'E' hnuaia
Sub-clause 2-a, games and sports
huaihawt phalloh tih hian games
and sports (Infiamna) leh inelna
(competition) mipui en tura
huaihawt a kawh a ni. Field, sta-
dium leh hall a insawizawi leh
inkhelh erawh chu phal a ni.

CYMA hmalakna
19.5.2020 : Secretary, Social Welfare
Deptt. Pisa-ah 'State Project Manage-
ment Committee under the NAPDDR for
the state of Mizoram' meeting neih a ni
a, Pu Vanlalruata, President a tel.
22.5.2020 : Pu Vanlalthanpuia (38) S/o
H.S. Lalhmangaiha, Electric Veng, Aizawl
ni 12.5.2020 atanga chin hriat loh a bo
zawn hna Central YMA kaihraina
hnuaia zawn tan a ni a. Ni 22.5.2020 hian
Central YMA Disaster Response Team
bakah, Phunchawngah Aizawl Venglai,
Ramthar Veng, Ramthar North, Dinthar,
Zarkawt, Saron, Phunchawng leh
Rangvamualah Ramhlun South,
Zonuam, Luangmual, Chawnpui,
Chhinga Veng, Armed Veng leh
Rangvamual-te an hnathlang.

**Heng ruihhlo, sum leh mipat
hmeichhiatna bawih a tan ang
bawh hian thatna suala tan hi
hlauhawm tak a ni. Thatna
suala tan hi chu a khirh hrep,
sualna kawnga fihlim viau
chung si hian
a sual viau theih lawi si.
Nangerawh chu Krista
thatnaa thuam ni ang che.**

Thu zia*k* Huang

BEL RUAK APIANG A RI RING

Sangpuia Pa,
Hmanlai kan pi leh pu te kha an hunlai leh an boruak tawn a zir khan thil an lo chhinchhiah tha in, thil an lo chik em em thin a. Kumpui lingleta hna thawk thin an nih avang khan an chhehvel boruak inthlak danglam dan an hre chiang em em baw*k*. “Hei hi ka mit, Hei hi ka beng” tih tluka thil hre chiang turin an inzirtir tha em em a ni. Hmelma ten an lo run thut maiang tih hlau reng reng khan hun an hmang baw*k* thin a, hei vang hian chen hona kawngah leh tanrual ngaihna kawngah thiltha inzirtir kha an tihmakmawh a ni. Thu tha leh dik tak tak , tunlai thlenga a dik zia kan hriat tam tak a awm a ni.

Thangtharte hian tluklohna tam tak kawng hrang hrangah hian kan la nei ti ila kan sawi sual lovang. Social Media in a nawlpui min run tak hnu kum 2010 hnu lam phei hi chuan kan nun phung a danglam nasa lehzu*al* hle a ni. Kohran, Khawtlang, chhungkua leh thianzaho thleng hian min nghawngna hi a tha zawng leh a chhe zawng sawitur tamtak a awm thei. Hetiang-ah tak hian a ni Bel ruak an lo rik rin thin chu.

Khawvela Guitar perh thiam hmingthang tak pakhat chuan ti hian a sawi, “Guitar perh hi ka zir nasat pauh leh ka thiamloh zia ka hrechiang tulh tulh thin” tiin. Kan tunlai khawvel ah hi chuan kan mithiam leh thil hriate hian hmun leh hun an chang meuh lo nite pawh hian a lang zawk hial a ni. Chung ho ai chuan mi tlawngawl, thiamna tak tak nei tura inzir peih silo, thil hre ril tura luhchilh tak tak thatchhe em em ho hian an mumang leh duhthusam niawm tak tak an han thlasik mauchang puahpui ve phawng phawng thin hi chu, an aia thiam leh hre ril tak takte hian engtin tak ngai ang maw?

Social Media kan hman dan ringawt atang pawh hian inzir tharna tur tam kan nei a ni. Ni khatah darkar 24 chhung kan awmna Goup-a active ber nih hi chhut chiang chuan thil zahthlak tak, kan awlthawng zia leh chhungkaw tana kan tangkai loh zia kan in show-na pakhatah a ngaih theih. Thil tangkai leh inzirnan hmang silova, thil ho mai mai khawih nana kan hun kan khawhral chuan a tuartu chu tudang nilovin, keimahni tho kan ni. Miten kan thu leh hla hi eng angin nge an ngaih tih ngaihtuah miah lova hre ber leh thiam ber anga rik vak vakte hi inthlahrun deuh ila atha khawp mai.

Kohran a kan rawngbawl puite lakah pawh hian insum huana insum hi kan tih tur pawimawh tak pakhat niin

a lang. Pastor pakhat in a tlangval lai a sawi ka hre reng thin. “ Ka piangthar hlim chuan kan kohhran Upa te ka hmu rova, anni aia khan Pathian thu hre zawk leh hre ril zawkah ka inngai hmiah. Mahse, Pastor niturin Pathian thu kan zirin kan han luhchilh tak tak mai chu, fanghmir tetakte, bawmehhung inkharphui vek atanga a chhehvel awm dan inti hre deuha sawi zet zet hi ka ang ber inkahria.” tiin ama awm dan a sawi. Pathian thu phei hi chu a zir chiang leh a zir mi apiang hian a ril zia leh a ropui zia an hrechian. Pathian thalrau thianghlim pawlna tak tak kan chang te a nih ngawt loh chuan lo tawng pawng basa ngam ve chi a ni lo.

Tunlai kan khawvelin hun khirh tak a tawn mek lai hian kan ram leh khawtlang tan eng thiltha nge ka tih theih? Enge kawngah nge khawtlang tan hian ka tangkai theih ang, tia kan rilru sukhlek kan siam hi a van tul em. Awmhmuna mi rilru tithlabar zawng leh tiphawklek thei thu post-te hi chin loh atan atha khawp mai. Eng ang mi nge ka nih tih hriat chianna awlsam tak a ni. Kan thu post atang hian kan khawvel thlir dan hi thui tak a hriat theih zu nia. Kan mizia tur awm ang pawh a niang chu.

Mihring hi kan inanglo, kan hmel, kan pian, kan duh zawng, kan lawm zawng, kan hlauh zawngte leh kan hriselna chen hian a inanglo. Thu hriat nuam leh Positive zawnga thil kan post tam hian midang tan malsawmna kan ni thei tih hre reng ang u.

Belruak, a khawng tuin a khawng nat deuha ri ring, a khawng zawih deuha ri zawi ang mai mai a thluak thawl ni lovin. Pathianin chhia leh tha hriatna ropuitak min pek hi kan awmna apiangah leh kan thil tihna apiangah midang te ngaichang chung zel hian hman thiam i tum theuh ang u.

Kan veng chhung a HSLC 2019 - 2020 Pass te :- (Tih hmaih palh leh tih sual palh a awm a nih chuan kan Editor te hriattir nise a lawmawm hle ang).

Sl. No	Hming	Pa/Nu Hming	Division	School
1.	H.Lalrempuia	H.Lalmuanpuia	I	Govt. Diakkawn H/S
2.	Malsawmdawngkimi	Vanlalmuana	I	St.John’s HSS
3.	Vanlalthafamkimi	R. Vanlalzua	I	St.John’s HSS
4.	Ngurnunpuui	Ngurduhzuala	I	Providence HSS, Aizawl
5.	Vasti Lalhruaitluangi	A. Laldawngliana	II	Susanne Downs Boarding School
6.	C. Lalmalsawmi	C.Rorelkima	II	St. John’s HSS
7.	K. Vanlalruati	K. Lalremmawia	II	Govt. Diakkawn H/S
8.	Samuel Lalchhanchhuaha	Remlala	II	Govt. Diakkawn H/S
9.	Arun Chhetri	Dipak Chhetri	II	Susanne Downs Boarding School
10.	Esther Lalrinpuui Sailo	Thangkima Sailo	II	Govt. Diakkawn H/S
11.	Remruatfeli	Lalnuntluanga (L)	II	Govt. Diakkawn H/S
12.	C.Zodinpuui	C.Zosangzuala	II	Govt. Diakkawn H/S
13.	P.C.Lalremsiami	P.C Ramluahtanga	II	Govt. Diakkawn H/S
14.	Lalchhanhimi	Lalrinmuana Pachuau (L)	II	Govt. Diakkawn H/S
15.	Jeho Lalzarngbaka	Dinsangmawia	II	Govt. Diakkawn H/S
16.	Jenny Ramniengi	Laltlanliani	III	Govt. Diakkawn H/S
17.	Mary Lalnunneihi	Laltlanliani	III	KolasibVengthar RMSA S/S
18.	Lalparmawii	Lalthangsanga	III	St.John’s HSS
19.	Lalrinhlui	Lalthangsanga	III	St.John’s HSS
20.	Vanlalruatdika	Ronny Lalbiakzauva (L)	III	KolasibVengthar RMSA S/S

HSLC a hlawhtling zawng zawng te Daifim Editorial Board ten kan lawmpui tak meuh meuh che u ani. Tin, tun tuma hlawhtling lo zawng zawng te, beidawng mai lova tang sauh sauh turin leh hlawhtling ngei turin in kal leh zelna turah duhsakna kan hlan baw*k* a che u.

Chhia leh tha hriatna hmangthiam chu mi ropui an ni a, an bulhnai ami tan thlamuanna an ni.

Thlawhna hmanga Mizorama lo lut turte zawm tur inkaihhraina

No.1325/2020-2021

Ministry of Civil Aviation, Government of India-in May ni 25, 2020 atanga India ramchhunga thlawhna thlawh a remtih tak hnuah COVID-19 laka him nan thlawhna hmanga Lengpui Airport kaltlanga Mizorama lut tur ten an zawm ngei ngei tur inkaihhraina siam a ni a. Mipuite him nan Mizoram mi leh sa zawng zawng te leh COVID-19 vanga State pawna tangkhang sawrkar hnathawk Mizorama thlawh luh tum zawng zawng ten a hnuai inkaihhraina hi an zawm ngei ngei tur a ni, tiin Pu Lalnunmawia Chuaungo, Mizoram Chief Secretary chuan a hnuai a mi ang hian thupek a ti chhuak.

An awm mekna hmuna Mizoram Sawrkar aiawh Government of Mizoram (Resident Commissioner, New Delhi/Jt. Resident Commissioner, Kolkata/ Dy Resident Commissioner, Guwahati/Shillong/Silchar) te hnenah an flight leh ticket chungchang kimchang takin an hriattir tur a ni. State/khawpua Mizoram Sawrkar aiawh (Mizoram House) awm lohnaah chuan an hnaih ber Mizo Welfare Association te hnenah an inhriattir tur a ni. Annexure 1 a proforma thil tel ang hian an chanchin Chiang takin an thehlut tur a ni. Mi tu pawh thu diklo thehlut emaw, zep emaw an awm a nih chuan hrem theih an ni ang.

Home Department, Government of Mizoram atanga phalna la hmasa lovin Lengpui Airport pan tur thlawhnaah chuan phal a ni lo. Permit la hmasa lo te chu Lengpui Airport chhuahsan phalsak an ni lovang. Passenger zawng zawng list kimchang chu Chairman, Task Group on Migrant Workers & Stranded Travellers hnenah thawn a ni ang a. Ani hian flight lo thleng tur apiang list kim chang siamin passenger-te thlen chin tur District tarlang telin Home Department pawmpui turin thlawhna thlawh chhuah ni (date of departure) thlen hma ni khatah, tlai dar 2 ral hmain a thehlut thin ang.

Lengpui Airport lo thleng thar apiangte COVID-19 symptoms an neih leh neih loh endik (screen) leh Rapid Anti-body Test (RAT) emaw, State Sawrkarin a bituk ang zela endik thin an ni ang. Ministry of Health & Family Welfare, Government of India in Red Zone-a a puan ram/khua atanga lo thlengte chu Lengpui Airport-a Rapid Antibody Test bakah an inkhunhranna (quarantine) hmun an thlen hunah RT-PCR test tih leh vek tur a ni. Lengpui Airport-a thlawhna hmanga lo lut zawng zawng te an awmna Deputy Commissioner te hmun ruatah ni 14 an inkhunhrang tur a ni.

Deputy Commissioner-ten ruahmanna an siamsak motor hmangin quarantine facility an pan tur a ni a. DC in a phalsak a nih loh chuan Airport-a inlamna tur remruatna dang siam phal a ni lo. Paragraph hmasa bera tarlante ni lo, Mizoram luh tum midang reng reng chuan thu leh awm hma chu Lengpui Airport panna tur thlawhna ticket an book hmain Home Department, Government of Mizoram hnenah phalna an la hmasa ngei tur a ni.

Inkaihhraina a chung a tarlante bakah Mizoram Sawrkarin SOP a siam te, sawrkar laipui Ministry of Civil Aviation-in Order No.AV.29017/5/2020-DT dated 21.05.2020 a tihchhuahte an zawm tur a ni. Civil Aviation inkaihhraina hi www.civilaviation.gov.in ah en theih a ni. MoCA in thlawhna thlawhchhuah hma pre-departure guideline a siam angin passenger zawng zawng ten Aarogya Setu mobile app emaw, Annexure 2-a form tarlan ang hian an hriselna dinhmun Chiang takin an tarlang tur a ni.

VANTHENGRENG MAKNALEHAN CHANCHINTAWI

1. Kan awmna lei atanga Universe chung kan hmuh theih zawng zawng hi 5% chauh zu ni a.
2. Mars kan tih atanga Ni(sun) chhuak hi a lang pawl a ni.
3. Mars-ah hian nunna awm theih turin kan awmna lei nen inang ber a ngaih a ni.
4. Mars-ah hian hipna (gravity) a tlem a vangin Khawvela 100kg hi Mars-ah chuan 38kg vel chauha rit a ni.
5. Kan lei heltu thla(Moon) hi 1.6 inch(4cm) in kum tin minhlat zawngin a tawlh hret hret thin.
6. Thla-ah khian kehniak hi hnutchhiah ta ila areh thei tawh lo, a chhan chu thli a awm loh vangin.
7. Planet zinga mi Mercury-ah hian atmosphere (Boruak) a awm lova, chuang chuan thli, sik leh sa(Weather) a nei ve lo.
8. Planet zingah Jupiter hian heltu thla 79 zet a nei a ni.
9. Vanthengreng(space) hian engmah thawm an nei lo, an reh vek a ni.
10. Eng(Light) hian Thla(Moon) atanga kan awmna lei thleng tur hian average in 1.3 second bak a mamawh lo.
10. Neptune planet hian Ni vawikhat helkual nan hian kan awmna lei Earth Year atanga teh a kum 165 dawn a hmang thin.
11. Mercyry ah hian nikhat hi a rei em em a, Kan awmna lei a ni 58 hi an ni khat nen a intluk tawh vel bawh.
12. Pluto a ni khat hi darkar 153.6 a rei a ni.
14. Ni (Sun) atanga eng(Light) kal hi kan awmna lei thlengturin 10 minutes aia rei angai lo.
15. Kan solar system-ah chuan Venus planet hi a lum/sa ber a ni.
16. Kan solar system chhunga planet zawng zawng zingah hian Mercury leh Venus-te pahni chiah hian heltu thla(Moon) nei ve lo awm chhun an ni.
17. Kan chenna khawel hi min heltu thla ai hian a let 81 zet in a rit zawk.

CHANCHINTHAR

Vawin ah Hyderabad atanga lo haw Mizote lo thleng dawn.

Hyderabad atanga Mizo tangkhang 600 chuang chu vawin pathianni hian Bairabi rel chawlhmun an lo thlen beisei a ni a, chuangchuan Kolasib DC in lo hawte tluang taka an District an thlen theih nan chetvel dan tur thupek a chhuah bawh. Tangkhangte lo phur tur bus vei vah lai hian mi tumah Bairabi leh Zero Point inkarah mihring leh lirthei kal phal a ni lo.

Sport lam thil Industry anga puan rawtna pawm.

Dt. 22/5/2020 a Chief Minister Office Committee Room a Cabinet thukhawm chuan Sports chu Industry zingah telh a rem ti. Sport & Youth Services rawtna anga Sport chu Indusrty status hlutak chu a pek a nih avangin Mizoram sport in nasa taka hma a sawn theih an beisei a ni. Hei vang hian Company leh mimal tam zawk in sport chu sumdawng nan/eizawnnan an hmang thei tawh dawn a ni.

Sikulpui leh Sikulsen hlan let

Dt. 22/5/2020 chawhnu lamkhan Sikulpui leh Sikulsen chu Mizoram sorkar kuta kum 68 a awm hnuah Mizoram Synod kuta hlan let leh a ni.

Thermal & Optical Bi-Spectrum lo thleng

Sawrkar laipuiin ram chhunga Airport hrang hrang May 25 atangin a hawng tan leh dawn a. Airport hawng thei tura neih ngei ngei ngai Thermal & Optical Bi-Spectrum chu H&F Welfare Department chuan Northeast a ahmasa ber niturin nilaini khan a chah thleng. He Thermal Camera hmang hian 2meter dana khawsik leh sik loh a en thei a, a rualin vawikhatah mi 10 a endik thei dawn a, hun a heh loh bakah rang takin heng a thlalak data-te hi Covid-19 lam buaipui tute hnenah email leh Whatapps hmangin a thawn zung zung thei dawn a ni.